

Ceacht Cré le Naíonáin (1) 'Créatúir Aisteacha' Gemma Mc Girr

<u>Snáth Curaclaim:</u>	Cré (Curaclam Amharcealaíona lch. 21)
<u>Cuspóir:</u>	<i>Féidearthachtaí cré mar mheán don chur in iúl samhlaíoch a fhiosrú agus a fhionnachtan (lch. 21) Déan cruth as cré agus déan láimhsiú air leis na méara chun ábhar a chur in iúl (lch. 21)</i>
<u>Nasc:</u>	Péint agus Dath > Úsáid dath chun mothúcháin, eispeiris agus nithe samhlaíthe a bhfuil cuimhne láidir orthu a chur in iúl (lch. 19) Líníocht > Déan líníochtaí bunaithe ar mhothúcháin a bhfuil cuimhne láidir orthu, ar eispeiris fhíora agus shamhlaíthe agus ar scéalta (lch. 18)
<u>Féidearthachtaí Imeachta:</u>	<i>Teanga labhartha: Díriú ar shonra tuairisciúil agus bí níos soiléire maidir le daoine, áiteanna, amanna, próisis, imeachtaí, dath, cruth, méid, ionad (lch. 20)</i>

An Ghníomhaíocht seo a Fhorbairt sa Rang:

Ag tosú: Sula dtosaím rang ealaíne sílim gur mór an chabhair í cleachtadh beag a dhéanamh leis na leanaí chun a gcuid samhlaíochta a scaoileadh saor agus chun timpeallacht shábháilte a chruthú sa seomra ranga dóibh ar mhaithe lena saothar a thaispeáint agus a phlé gan eagla ná náire. “Nuair a bhí mise i mo leanbh d’fhéadfadh sé sé seachtaine a thógaint orainn grianghraf a chur chuig mo chol ceathracha san Astráil. Is féidir linn grianghraif a sheoladh anois i gcúpla nóiméad le fón póca! Is féidir é seo a dhéanamh mar gheall ar gur bhain daoine úsáid as a gcuid samhlaíochta. Is féidir le rud ar bith tarlú inár samhlaíocht má ligimid dó! Dún do shúile agus samhlaigh doras mór. Tig le dath ar bith is mian leat a bheith air. Scríofa i litreacha móra ar an doras tá an focal SAMHLAÍOCHT. Sín amach do lámh agus oscail an doras go mall, scaoil amach do shamhlaíocht! Oscail do shúile agus lig dom an loinnir a fheiceáil iontu! Is féidir linn ár rogha rud a dhéanamh anois, tá ár samhlaíocht ag obair agus is duine ar leith gach duine dínn!”

Ábhair Riachtanacha: Cré potaire
Cláir adhmaid nó cárta láidir (chun obair air)
Uirlisí cré nó cipíní líreacáin
Buicéad plaisteach le clúdach teann, nó málaí plaisteacha chun an chré a stóráil

Spreagadh: Tabhair liathróid chré do gach leanbh de mhéid a bheadh compórdach ina lámh. Iarr orthu a rá conas a mhothaíonn an chré - ‘fuar, greamaitheach, salach, sleamhain, fliuch, tais’ a deirtear de ghnáth. “An féidir leat an chré a phriocadh? Cad a tharlaíonn nuair a phriocann tú é? Cén chuma atá air? An gcuireann sé aon rud i gcuimhne duit? Prioc go minic é, agus cén chuma atá anois air? Rollaigh ina liathróid é agus sáfaímís ár méara sa chré. Bain triail as sin ar an gcré go léir. An gcuireann sé aon rud i gcuimhne duit? Déan cur síos air. Cad a tharlaíonn má fháiscimid an chré? Tabhair fáisceadh an-mhór dó! Fáisc le do dhá lámh é. Cén chuma atá air anois? Má lúbaimid an chré cad a tharlaíonn? Cén chuma atá air? Lúb go láidir é! Má bhriseann sé an féidir linn é a chur le chéile arís? Bain triail as lúbanna beaga ar an gcré go léir. Cén chuma atá air? An bhfaca tú a leithéid riamh cheana? Bainimis triail as an chré a fháisceadh, a phriocadh, a tharraingt, a shá agus a lúbadh. Cén chuma

atá anois air? An bhfaca tú a leithéid riamh cheana? Cad a d'fhéadfá a thabhairt air?"

Gníomhaíocht:

Cuir liathróid chré le do chluais agus abair leis na leanaí go gcloiseann tú fuaim éigin. Bí chomh drámatúil agus is mian leat agus é seo á dhéanamh agat, is breá leis na leanaí é! Iarr orthu 'éisteacht' lena liathróid chré féin. "An gcloiseann tú aon rud? An bhfuil rud éigin sa chré ag iarradh teacht amach? Cén fhuaim a dhéanann sé? An rud beag nó mór é?" Mínigh gur féidir leo cabhrú tríd an chré a phriocadh, a bhrú, a fháisceadh, a tharraingt agus a lúbadh. Cad iad na cruthanna a thagann as an gcré, iarr ar na leanaí tuairisc a thabhairt fúthu. "An bhfaca tú ceann riamh cheana? An gcuireann sé aon rud a chonaic tú riamh cheana i gcuimhne duit? An féidir leat ainm a chur air? Conas a bhogann sé? Cé mhéid cos atá air? Conas a itheann sé? Cad a thaitníonn leis a ithe? An bhfuil teaghlach aige? An bhfuil aon chara aige? An dtéann sé ar scoil? Cad iad na cluichí a thaitníonn leis a imirt?" Bíonn an chré á láimhseáil ag na leanaí agus tuairisc á thabhairt acu ar a 'gcréatúir', agus na huirlisí chré á n-úsáid acu chun uigeacht a chur sa chré. Ag deireadh an cheachta, mínigh do na leanaí go bhfuil tuirse ar an gcréatúr beag agus go dteastaíonn uaidh dul abhaile, ach go dtiocfaidh sé ar ais lá éigin eile. Mura mbíonn sé in ann teacht, b'fhéidir go dtiocfaidh duine dá chairde ina áit! Níos déanaí b'fhéidir gur mhaith leis na leanaí a gcuid créatúr a 'choinneáil', is féidir iad a fhágáil ag triomú agus iad a phéinteáil más mian leis na leanaí.

Measúnú/Ag Amharc agus ag Freagairt:

Beidh sé seo ag tarlú agus na leanaí ag obair. Féadfaidh na leanaí tuairisc a thabhairt ar a seal féin faoina bhfuil déanta acu agus ceisteanna a chur ar a chéile faoi na créatúir a fuair siad i bhfolach sa chré. Spreag na leanaí chun amharc ar shaothar Antony Gormley agus é a phlé, go háirithe a shaothar 'Field for the British Isles'. An féidir leo a rá conas a rinne sé na figiúirí chré go léir atá sa saothar?

Gníomhaíochtaí Breise:

Nuair a bhíonn am tugtha do na leanaí chun cré a fhionnachtan féadfaidh siad créatúir fhíora agus shamhalta de gach cineál a fháil sa chré, ainmhithe, carachtair as scéalta agus as dánta.

Féidearthachtaí TCF: http://www.handsoncrafts.org/studio_frame.htm

Is suíomh idirghníomhach é seo a ligean do leanaí crúiscín aghaidhe a chruthú ar líne. (Beidh gá le Shockwave ar do ríomhaire.)

Ag baint úsáide as an DVD

Is Ealaíontóir mé:

Tugann na cláir *Cré* ar an DVD deiseanna chun leanaí a fheiceáil agus a chloisteáil ag úsáid chré mar mheán chun iad féin a chur in iúl go samhlaíoch.

Nóta:

Fuair mé amach gurbh fhearr sprae plandaí a úsáid chun an chré a choinneáil tais agus na leanaí ag obair. Má fhágtar soithigh uisce ar na boird i Ranganna Naíonán tig le cré imeacht ina shruthanna i ngach treo!

Ealaíontóirí Ábhartha: Antony Gormley

Suíomhanna Idirlín Ábhartha:

Field for the British Isles

http://www.antonygormley.com/full_list/280x1_field_for_british.htm

Suíomh oifigiúil idirlín Anthony Gormley

<http://www.antonygormley.com>

Is tairseach é Scoilnet chuig suíomhanna atá úsáideach sa seomra ranga

<http://www.scoilnet.ie>